

Schreiben der Bürgermeister und Räte der Städte Bielefeld, Lemgo und Herford an Minden vom 15. Juni 1585:

Vnsere freundtliche dienste mit erbietungh alleß gutten zuvor. Erbare vorsichtigh vnd wolweise gunstige herrn Nachbawer vnd gute freunde. Wir muegen Ew: E. W: nicht vorhalten welcher gestaltdt wir nun auf etzlichen Hansetagen vnß zum höchsten mundtlich auch zu mehrmahlen schrifftlich beklagt, daß vnß von wegen vnser vnvormuegenheitt Auch vieler obliggender Reichß vnd Kreses Contribütion, vnd dan Furst vnd Grafflicher Landschatzungh fast vnmueglich der Hanse geselschafft dero auch vbermeißigenn gefurderten Contribütion vnd vnwerungh halber beyzuwhonen, Dabey gemeinen Ansetzten nicht zuerhalten, daß von vnß all vnd Indes Jhars ein genantz alß etwan In sambt zwentzigh oder dreitzigh thaler zum eußersten aufgenhomen werdenn muchten, dabey dan auch mit allen fleiß angewogen daß wir vnß gantz keins furtheils oder nutzen auß der Hanse Societet wusten zugewarten.

Ob wir vns nun woll gantzlich vorsehen, solch vnser Klage dedücierte vrsachen bitt vnd sachen in achtungh gebuerliche Communication vnd betrachtungh genhomen sein solte, so vormirchen[?] wir doch auß den vnß von den Achtbarn herrn von Colln zugeschickten acten solches gantzlich hinangesetzt vnd vorbegegangen, vnd nur dahin gesehen wirdt, wie man von vnß beschwerliche summen an angegeben restanten vnd von newen angemudeten zulagen außquetzen muchte.

Alß wir vnß nun gantzlich vormueten Ew: E. W: von gedachtenn von Coln gleichmeißige acten schreiben vnd anmuetunge werden bekommen haben, vnd vnß dabey die gedancken machenn daß auch Ew: E. W: den gantzen vnderganck dero gerurten Hanse Societet vormirchen worden, sinthenmall fast alle vnd Jede Privilegia der Cuntorn[?] so woll In Engelandt alß In Liflandt vnd anderer orter wie dan auch der vorders deß beschwerlichen newerbauwten Osterschen Hauseß zu Andorpf den Ansche Stetten entzogen, vnd vor augen stehet, Auch dahero lichtlich muchten bewogen werden, sich solicher Societet auch thaidtlich zueußern. Zuuorab alldeweill le kein nutz so dieße Stette haben muchten gespeuret wirt, oder vnß kan oder magh angegeben werden, sunder daß nur auf die Contribution getrungen vnd erhaltungh der vornhemen Stette an der sehe kanten, Rein vnd andern schiffreichen strömen gesaht wirt.

Alß wir nun aber In diesen sachen sunderlich allein auß den vrsachen, daß vnser voreltern soliche Societet Ingangen, vnd auf vnß ererbet, Auch nicht wißen können wan wir vnß deroselben gantzlich vnnd pürè abdiciert vnd enteußert, waß vor detrimenti darauf erfolgen muchte, ein groß bedencken habenn, vnß darin selbst beschwerlich rhaten können, So wollen wir Ew: Erb: W. dienstfreundtlich gebetten haben, vnß deroselben getrewen rhaitt hirtu mitzutheilen, vnd wie sich dieselb hirtu zunachalten bedenckens vnd vorhabens, auff guidt vortrewen zu Communiciren: Solte eß auch vor ratsam erachtet werden derhalben mundtlich zuconferieren, bitten wir vnß deßhalben tage, Zeitt vnd stunde, zubestimmen vnd zuzuschreibem, Sein wir erbietens, die vnser darzu abzuferdigen.

Ew: Erb. W. dazu wir vnß alles gueten vnd nachbaurlicher befurderungh vortrosten wollen, sich hirtu gudtwilligh erzeigen, daß hinwiderd zuvordienen sein wir mehr dan willigh vnd

thuen Ew: Erb: W. In den gnedigen schutz deß Allmechtign empfellendt. Dat. Schottmar den
15. Juny An. 85.

Burgermeistere vnnd Rhädte dero Stett Harfurd, Lemgo vnd Beilfeldt.